

Gwn cieng gvaq, Daegcih caeuq Dahriemj youh yaek dauqbae Guengjdoeng lo. Daegcih gig siengj umj Daegyou baez he, vih neix de ndenq dangz ndenq bingj, ndenq ngaenz ndenq buh moq, Daegyou cungj mbouj aeu, cij got ga daxbuz mbouj cuengq, lij heuh daxbuz vaiq daiq de bae youz, Daegcih caeuq Dahriemj raemxda loenqbyoegbyoeg mbouj dingz.

Daegcih youq baihrog guh hong sinhoj, hoeng mbouj siengj hawj lwg caeuq daxmeh youq ranzcoj gwn hoj. Ndigah Daegcih ndwenndwen geiq ngaenz dauq hawj daxmeh, heuh de mbouj caiq bae guh hong reihnaz, youq ranz guenj ndei Daegyou couh baenz.

Mbouj geij nanz, Daegyou daengz seiz bae hagdangz doegsaw lo. Hagdangz liz ranz gyae, lij aeu byaij gvaq geij aen mboq. Daxbuz mbouj cuengqsim, haetromh aemq Daegyou bae hagdangz, banhaemh youh bae hagdangz ciep Daegyou dauqma, ngoenz fwn doek mbouj dingz, ngoenz ndit ndat mbouj duenh. Daegyou daj iq couh mbouj miz bohme in, de ciengzciengz doiq daxbuz de guh’unj guhnyah, seizseiz mbouj siengj lizhai daxbuz de. Daxbuz de ciengz aeu ngaenz daeuj yaeuh de, daengq de dingqvah, roengzrengz doegsaw, ngeix gwn maz couh bae cawx maz.

Daegyou cib bi seiz de naeuz mbouj doegsaw lo, daxbuz de hix mbouj rox gangj maz lo, caih de maij guh maz couh guh maz. Daegcih dauq

•cienlanz sawcuenh•

Gouq



Yiz Ciz

ranz baez ndeu, de naemj heuh Daegyou caiq bae doegsaw. Hoeng Daegcih youq ranz caet bet ngoenz, Daegyou mbouj haeuj ranz saek seiz, Daegcih bi gyaeuj laklak liz ranz bae lo, de gag gangj gag naeuz: “Rangz sang gvaq faex lo, rangz sang gvaq faex lo.”

Vah gangj gyae lo, caiq gangj Daegyou byaij daengz gyawj, Daegcih naeuz: “Yo, dingqnaeuz mwngz deng sieng lo, gou daegdaengq dauq ranz yawj mwngz, gij sieng mwngz ndei di caengz?”

Daegyou mbouj ok sing, hix mbouj cim Daegcih da he, cigsoh byaij haeuj ranz bae, Daegyou ruprap gwn vanj souh ndeu, youh ok doulaeng bae lo.

Daegyou bae gizlawz, Daegcih mbouj rox; Daegyou bae guh maz, Daegcih hix mbouj rox. Daegcih naengh youq gyang ranz, cim coh

daxmeh, byoem aen gyaeuj daxmeh yaek hau caez lo, de sim baez soemj, raemxda yaek conh ok.

Daegcih mbouj gamj caiq cim aen naj daxmeh, hix mbouj gamj naemj daxmeh baenzlawz sinhoj, de byaij daengz bakdou, haida yawj bae, doiqnaj dwg goengq bya hung sang ndeu. Couhdwg goengq bya hung sang neix dang mbanjcoj de, hawj mbanjcoj de roen mbouj ndaej doeng, dienh hix mbouj ndaej daengz, ciengx ndaej ndaem ndaej hoeng gai mbouj bae, ndaw mbanj cib ranz miz gouj ranz gungzhoj. Laj dinbya dwg gij reih de, seizneix cib lai bi mbouj raeq lo, ndaw reih maj rim gohaz, gwnz bya faex mwn, loegauau, yawj hwnjdaeuj funggingj gyaeunde i bw!

Geiqndaej bi he, Daegcih hwnj goengq bya hung he bae aeu fwnz, mbouj haeujsim couh roux roengz dat bae, gyaeuj deng saeg congh, lwed

laeyeye, gyo’ndaej miz baengzyoux Daegnou aemq de ma ranz, mboujnex couh ce mingh youq gwnz bya lo.

Mbanjranz couhdwg yienghneix, mbouj miz haeux gwn, mbouj miz fwnz ndaengj, mbouj miz ngaenz yungh. Danghnaeuz mbouj dwg yienghneix, bouxlawz maij vut meh ce lwg okrog bae dajgoeng a!

Hwnz lo, lij caengz raen Daegyou dauqma. Daxmeh doiq Daegcih naeuz: “Gaej caj de lo, Bohyou mwngz bae ninz ba.” Daegcih haeuj rug bae, hoeng hwnz he hix mbouj laep da.

Mbwn yaek rongh seiz, rog ran miz vunz hemq ra Daegcih. Daegcih doq hwnqdaeuj hai dou, bakdou gaengq ndwn miz geij boux minzgingj.

Boux minzgingj he cam naeuz: “Mwngz couhdwg Daegcih ba?” Daegcih dap naeuz: “Gou couhdwg!” Minzgingj naeuz: “Daeglwg mwngz ok saeh lo, mwngz caeuq dou bae baicuzsoj baez ndeu ba!”

Dingq daengz neix, Daegcih roxnyinh mbwn laep caez, bak mbouj riengx naj mbouj swiq, engq mbouj ndaej gwn saek di doxgaiq couh gaen minzgingj ok dou bae.

Daeuj daengz bak mbanj, Daegcih raen Daxgoeng Liqlaenj caeuq Mehdaiq Daegngeq hix deng minzgingj heuh daeuj.

Vah faen song baih gangj, haemhlwenz Daegyou daj doulaeng okbae le, couh bae ra Liqlaenj caeuq Daegngeq, Daegyou doiq Daegngeq naeuz: “Haemhneix raeuz bae dwk denswj youzhi ba.” (caengz sat)

Vihmaz Cij Miz Mehmbwk Roq Longj?为什么只有女人打砵?

Vangz Gozgvanh / 黄国观

Vihmaz cij miz mehmbwk roq longj ne? Aen neix miz aen goj riuz ndeu.

Riuz naeuz, gaxgonq miz boux lwgsai ndeu, lij iq seiz bohme in de caez dai lo, de mbouj miz mbaenq baengh, saedceij gvaq ndaej cibfaen hojnanz. Bang ranz mbiengj doeng rap fwnz gwn can ndeu, bang ranz mbiengj sae sou haeux vuenh donq ndeu. Daengz ndang maj hung miz rengz couh haeuj ndaw bya bae vet longj. De baengh rengz swheij gag ciengx bonjfaenh gamjdoengh gwnzmbwn dahsien ndeu. Dahsien neix couh roengzdaeuj caeuq de doxaeu baenzranz.


Doeklaeng, gij saeh neix deng vuengzdae q rox lo. Vuengzdae q maez boux dahsien neix, couh naemj aeu dahsien neix haeuj vuengzgung daeuj guh yah’oiq de. Ndigah, de couh siengj aen geiq ndeu, baij vunz gaemh lwggyax neix haeuj vuengzgung, heuh de soengq duz mou ndeu lumj Byadaisanh nei naek, soengq gang laeuj ndeu laeuj lumj diuz raemxdah nei lai, soengq bit baengz ndeu lumj diuz roen nei raez, soengq aen ceiz ndeu itdingh aeu miz it fanh song cien gaen. Vuengzdae q lij daengq gij

doenghgaeiq neix aeu youq ndwencieng coit soengq daengz, mboujnex couh aeu soengq yah de daeuj.

Fandauq daengz ranz, de mbouj gamj caeuq yah de gangj gij saeh neix, cij dwg baenzngoenz mbouj gwn mbouj ndoet, siengj baenzlawz bae ra daengz gij doxgaiq vuengzdae q heuh de bae ra. Yah de cam de, de couh gangj lo. Dahsien neix rox liux, couh riu lo, cij daengq lwggyax gwn haeux gonq, de ndaej ra daengz gij doxgaiq neix.

Ndwencieng coit daengz lo, gyoengq bing youh gaemh lwggyax neix bae vuengzgung. Yaek okdou seiz, yah de soengq hawj de aen caengh ndeu, aen rok ndeu caeuq fag cik ndeu, caemhcai q son de baenzlawz doiq vuengzdae q gangj.

Raen daengz vuengzdae q, lwggyax neix ndenq aen caengh gvaqbae, doiq vuengzdae q gangj: “Vuengzdae q mwngz baij vunz bae caengh Byadaisanh miz geijlai naek ba, mboujnex mwngz hix mbouj rox duz mou yah gou ciengx caeuq Byadaisanh dwg mbouj dwg naek doxdoengz.” Vuengzdae q ngeix yaep ndeu, cij naeuz: “Byadaisanh gou couh mbouj bae caengh lo, saeh neix suenq



Raemxrij laelingling. Dahyingh ingi

mwngz guh daengz.”

Lwggyax neix youh ndenq aen rok gvaqbae naeuz: “Vuengzdae q mwngz baij vunz dawz aen rok neix bae daek raemxdah miz geijlai rok, gou couh bwh ndei aen gang cang ndaej baenzlai rok laeuj.” Vuengzdae q ngeix yaep ndeu, naeuz: “Gij laeuj neix gou couh mbouj aeu lo.”

Lwggyax neix youh ndenq fag cik gvaqbae naeuz: “Vuengzdae q mwngz baij vunz bae rau ga roen miz geijlai raez, yah gou couh gunghawj gij baengz raez doxdoengz.” Vuengzdae q youh ngeix yaep ndeu naeuz: “Gij baengz neix mienx lo, mwngz mbouj yungh soengq daeuj.”

Lwggyax neix youh naeuz: “Yah

gou cingq daem haeux guh ceiz. Gij sing roq longj ‘dong dong dong’ gaengq cienz daengz gingsingz lo, vuengzdae q mwngz dingqnyi lwi? Guh ceiz neix ndei lo, vuengzdae q mwngz itdingh caenn dang bae aeu.” Doeklaeng Vuengzdae q maz cungj mbouj gangj lo, couh cuengq Lwggyax neix dauq ranz lo. Gyoengqvunz cungj haenh dahsien neix mbeihung youh coengmingz.

Doeklaeng, gyoengqvunz vih geiqniemh dahsien neix, moix bi ndwencieng coit guh ceiz baij youq gwnz faengx caeq cojcoeng. Caemhcai q youq ndwencieng coit haetromh, gyoengq mehmbwk lij yunghrengz roq longj.